

Makginzsaeh Hoengz Lo

☐Vangz Haijyen / 黄海燕

Gou ceiq maij gij go makginzsaeh ranzcoj, ndaw mbanj ndaem go makginzsaeh, bakmbanj、laeng mbanj、gwnzbo seiqlengq cungj ndaem. Seiz mak baenz, dauqcawq henjriri、hoengzfwgfwg, gig gyaundeï.

Daengx bi seiqgeiq, go makginzsaeh bienqvaq gig hung.

Seizcin, dwg geiqciet cin raeuj va hai, miz fwncin nyinh, go makginzsaeh hix dok okdaeuj, gvaq song sam ngoenz, go makginzsaeh hidauez ciemhciemh dok mbaw oiqupup.

Ngux nyied co’ ngx bae ranz, gou youh bae yawj go makginzsaeh, gij mbaw gig mwnnoengq, doengzseiz hix giet haujlai mak iq, gij mak iq caegcaeg ndoj youh laj mbaw, lumj caeuq raeuz guh gaemhndoj nei. Youq gyaе yawj bae, cungj mbouj rox gizlawz dwg mak, gizlawz dwg mbaw.

Seicou daeuj daengz, mak ciemhciemh baenz, hidauez lij dwg

aen iqiq youh heuheu, gvaqlaeng bienq lumj aen daizgiuz hung. Gvaq ndwencaet, makginzsaeh couh ciemhciemh bienq henj, gij mak henj youq ndaw mbaw, yienh ndaej gig lwenqda. Gou ndwn youq laj go mak, ngiengxgyaeuj yawj go makginzsaeh haenx, raq rumz ndeu ci daeuj, mbawfaex caeuq mak bibi buengqbuengq, gyoengqde lumj coh gou riunyumnyum.

Cib nyied, dwg aen geiqciet fungsou ndeu, hix dwg makginzsaeh fungsou seiz, gwnz gomak venj rim makginzsaeh. Vunzmbanj bouboux nyaengq mbaet mak, makginzsaeh sou daengz ranz, miz vunz aeu cimq guh makginzsaeh byot, miz vunz aeu daeuj dak guh bingj makginzsaeh. Daihgya youq ndaw reih itmienh gangjriu, itmienh mbaet mak, nyaengq mbouj dingz. Gyoengqde baenz loz baenz loz mbaet roengzdaeuj, baenz ci baenz ci

rag bae ranz, ndangdaenj yienznaeuz naek, hoeng gyoengqde bouboux najriu najhai.

Mbanjranz gou dwg aen dieg guh bingj makginzsaeh ndeu. Gyoengq vunzmbanj sou makginzsaeh dauq, yungh gihgi baenz aen baenz aen bok naeng ndei, caezcupcup baiz youq ndaw lamz, lamz rim couh dawz hwnj gwnz gaq bae dak. Dak seiz, baez aen baez aen fan, yienghneix bingj makginzsaeh sauq vaiq, gij makginzsaeh bok naeng ndei haenx ngoenz gvaq ngoenz bienq hoengz. Daih’iek dak aen singhgiz ndeu, couh ndaej gai aeu ngaenz. Gij bingj dak ndaej haenx aen’ aen benj, aen’ aen unqnemnem, gwn haеuj bak youh rangdiemz youh niunini, gig ndeigwn, bouxgeq lwgnyez bouboux maij gwn.

Bineix gou bae ranz, ngamqhab bungz daengz ciet makginzsaeh. Ngamq byaij daengz bakmbanj, fanh

moux makginzsaeh yienh youq baihnaj, makginzsaeh henjriri, gig ndeiyawj. Yinx daeuj gak dieg boubhek. Song henz loh, vunzmbanj gag dawz makginzsaeh、bingj makginzsaeh okdaeuj gai. Gyoengq boubhek baebae dauqdauq, miz vunz cawx makginzsaeh, miz vunz cawx bingjlwgsaeh, miz vunz youq laj go makginzsaeh ingjsiengq、cimz mak, miz gangj miz riu, gig nauhyied.

Seizneix, vunzmbanj bouboux baengh song fwngz gaenxguh, ndaem hwnj daihbaj makginzsaeh, gyalai souhaеuj, ranzranz hwnj ranzlaeuz, gwndaenj ngoenz beij ngoenz ndei.

Seizdoeng, mbaw go makginzsaeh cungj loenq liux, gij mak mbouj sou daengz lij venj youq gwnz go, engqgya hoengz, youq gyaе yawj bae, lumj aen dem aen daengloengz.

Daengx bi cin、hah、cou、doeng seiqgeiq, gou ceiq maij seizcou.

Fwen Naek

☐Yiz Ciz/余执

It

Mwngz naeuz gou mbouj naek,
Yawj saeknaj cix rox,
Boh cam baenz maz bingh,
Naj nding daengz goek rwz.

Mwngz naeuz gou mbouj naek,
Yawj saeknaj roxnde_q,
Meh cam gou aeu vah,
Bak aj mbouj miz coenz.

Ngeih

Mwngz naeuz gou mbouj naek,
Laep da ciz baenz fangz,
Naemj daengz mwngz le gvang,
Ndang fouz lumj yiuhsa.

Mwngz naeuz gou mbouj naek,
Laep da cix raen ngaеuz,
Vunz guh angq bae youz,
Sim gou fouzfangfang.

Sam

Naek mwngz lumj naek va,
Youq caznya hau maeq,
Fwngz yiu yiu mbouj ndaej,
Faex fad fad mbouj daengz.

Naek mwngz lumj naek va,
Gak gyang Dahbulin,
Aj fwed mbouj ndaej mbin,
Yaek daiminj biendah.

Seiq

Naek mwngz lumj naek gim,
Da cim mbouj ndaej aeu,
Naek mwngz lumj naek haеux,
Caeuz ngaiz mbouj ndaej noix.

Naek mwngz lumj naek gim,
Da raen sim ciz maij,
Naek mwngz lumj naek ngaiz,
Yaek dai lij gwn amq.

Haj

Gou naek mwngz lailai,
Dai sam ngoenz ndaw mbonq,
Boh fonj gyaеuj dauq din,
Sim diuq ndang mbouj doengh.

Gou naek mwngz lailai,

Dai sam ngoenz gwnz congz,
Meh heuh bae guhhong,
Gou gongz lumj boubxingh.

Roek

Gou naek mwngz lailai,
Ngaiz mbouj gwn hix imq,
Ngeix daengz mwngz le gim,
Sim cieг lumj feiz coemh.

Gou naek mwngz lailai,
Cai haеux donq mbouj gwn,
Naemj daengz mwngz le lwnz,
Fangzhwnz riux doxcoh.

(注: gvang、gim、lwnz 意为: “阿哥”或“阿妹”)

Lauxdoengz

☐Moz Lijginz / 磨礼勤

“Moix caengz 1300 bingzfueng mij, doengh laeuz ndeu couh 41300 bingzfueng mij, doengh cibhaj caeuq doengh cibroek couh miz 83200 bingzfueng mij, bau hoi ndeu baez daih’it gvet ndaej cibhaj bingzfueng, baez daihngeih gvet ndaej ngeihcib bingzfueng, song doengh daihlaeuz daih’iek aeu 8000 bau.”

Lij Danenz naeuz, lumj boih saw nei, Lungzingh simfug raixcaix.

Lungzingh ndawbak lumj gwn dangzrwi diemzswdswd. daengx ndang diemz fiz lo, miz song boux lauxdoengz

bang siuhuq, gamjgik mbouj caenh, bineix seng’ eiq mbouj ndei, haicei caeuq souhaеuj baenz fanjbeij. Geij bi neix daeuj, cangjinizswjfw_{nj} lumj fwn gvaq rangz noengq hwnj, Lungzingh hix hai aen ndeu, baenzlawz rox, vunzlai cungj cawx gij huq mingzbaiz.

“Bae, raeuz daengz bouqlaeuj gwn donq haеux ndeu.”

Lungzingh vuenheij dwk naeuz, Vangz Gencingh yawj soujgih, naeuz: “Docih sim’ eiq lauxdoengz, seizgan dap ci yaek daengz, gou aeu gaenj baema, deq hong guh caez raeuz caengj comz doxcaeuq gwn haеux.”

Song lauxdoengz hwnj ci

Lungzingh bae bouqlaeuj, Vangz Gencingh caj ci hai deuz le caengj naengh cigunghgyauh daengz cehcan dap ci ma ranz.

Gouj

Mbanjliz, mbouj dwg singq Liz, cienzgangj sam bak bi gonq miz geij ranz singq Liz youq gvaq, gyoengqde senj deuz le, geij ranz singq Vangz daj doengbaek deuznanh daeuj daengz Mbanjliz youq, seizneix gaenq miz betcib lai hoh cien lai vunz, diegbo, aenci ginggvaq ndaejniy_i hauhdoengz yiengi, mbanj caeuq goengloh gek miz song leix roen, Vangz Gencingh

byonghroen roengzci byaij ma daengz bakmbanj, vunzmbanj Vangz Genhuj duq vaiz ma riengh, raen Vangz Gencingh daj Namzningz dauqma, couh deq mbouj gib cam naeuz: “Beixcingh, ra ndaej hong hawj dou guh lwi?” Vangz Gencingh han naeuz: “Miz hong guh lo.” Vangz Genhuj angq naeuz: “Miz hong guh couh ndei lo, dou youq ranz deq nanz lai lo.”

Vangz Gensaiz daj ndaw daemz dwkbya ma ranz, raen Vangz Gencingh le, sikhaek soengq song duz byavanx hawj Vangz Gencingh, Vangz Gencingh doeksaet yat, naeuz: “Song duz bya neix miz cibgeij gaen lo, mwngz ngamq ce song duz bya iq……” Vangz Gensaiz daihfueng naeuz: “Gou miz daemz ciengzciengz miz bya gwn, mwngz dwgrengz ra hong hawj dou guh, docih lo.” (12)

